




مسرحيات
للأطفال
والعرائس



قرص غسل
من غير كسل

تأليف: سيد محمد الباق
رسم: محمد الباق



قرص عسل
من غير كسل

تأليف : سمير عبد الباقي
رسوم : نجوى شلبي

قرص عسل من غير كسل

- مسرحية في مشهدين
- تقدم بالعراس والأقنعة .. كما يمكن تقليدها
- بشريا بأقنعة خفيفة مع الاهتمام بالموسيقى



مسرحيات
للأطفال
والعرائس

٢

شخصيات المسرحية





المشهد الأول

الراوي : (أبو الحكاوي ظريف خفيف الدم سريع الحركة لطيف الوجه والكلمات يرقص ويلاهي .. وهو يفتي) :

.... أهلا وسهلا من كل قلبي ..
يا للي حضرتوا .. وغفرتوا ذنبي ..
أنا مش ح أقصر .. لكن .. ح أفسر
كل المخبي ..

...

خليك معانا .. يا عم أشرف .. ويا عم مجدى
اسكت ولطف .. وانتي يا شاطرة يا ست لوزة ..
أنا شايلكم لوقت عوزة ..
لما أخلص .. لازم نسقف ..
سمع سمع .. يا واد يا مجدع ..
دلوقتي نسكت ويلاش نشوشر ..
دالوقت غالى .. بكره حتعرف ..
فيه ودن تسمع ..

وودن مقطف ..

وودن طرشه .. تفضل علامه

ع الجهل دايمة ليوم القيامة ..

واحنه النهارده لازم نجدد .. قديم بلدنا ..

عشان ولادنا .. مااحناش في متحف ..

وانا عندي ياما ورا الستاير .. ميت ألف منظر ..

وانا مش باهزر .. وآدى حكايتنا ، ح تلاقى فيها

معنى لحياتنا

والشرط نور .. من البداية ..

ح تشجعونا .. عند النهاية ..

وتسقفوا لنا .. قولوا معايا ..

يا شمس بكره دقي البشاير .. وياعم نور ..

شيل الستاير

(موسيقى مرحة مع رفع الستاير عن المنظر .. في حديقة ساحرة ..

أزهار ونحل وفرشات يتدرج الديكور ليسمع باستخدام عرائس للنحل

والفرشات وبانتقالها إلى مستوى آخر لمثلين يرتدون الأتعة حين

الحاجة ، في مناظر الاستعراض والرقص التالية ..)

(يدخل كلب ظريف له ملامح إنسانية ، في حركته وشكله ما يؤكد على

التعاطف معه وجهه ، رغم الضحك عليه ومعه)

الكلب : ها .. ها .. ها .. هاو ...

ها .. ها ها هو هو ...

يا سلام لما يروق الجؤ .. جؤ .. جوجو

والورد الأشكال ألوان ..

والمصافير بتصوصو .. صؤ .. صوصو

وما فيش دوسة ناس وكلام ..

والفسحة لوحك نخلؤ .. لو .. لولو

هو هو هاؤ .. هو هاؤ هو هو ..

يا سلام لام .. يا سلام لولو .. لولو ..

هاااااه ...

(يتشمم الورد ويتبادل مع الرقص والحركة والعمس ..)

الكلب : آه .. ريحة الورد جميلة .. والدنيا حلوه .. حلوه عشان مليانه

ورد .. وكلاب حلوين زى .. أكيد الورد كان عارف ان كلب جميل

زى ح يشمه عشان كده .. فرحان وملون نفسه .. ومعطرها ..

عشان خاطرى ..

ها .. ها .. هو .. (يعطس) .. حتى العطسة ريحتها حلوه

وصوتها يجنن .. آه .. أقطف الورده دى .. لا .. لا .. دى ..

لا .. دى .. لا .. لادى .. ولادى .. مالوش لزمه .. مكانها
أحسن هنا .. ريمحتها تفضل كثير بدال ما تدبل في ايدى آه .. أهوده
الكلام اللى له لزمه ...

(فبجأة تطير فراشة كانت مخفية بين الأزهار . تشبه الزهرة الجميلة يبهره
المنظر ويميره .. ثم يبدأ فى الانتباه .. وتشكل الفراشات والنحل فى
تشكيلات راقصة مع الموسيقى والأغنية)

ها ... آه .. ياخبر .. ياخبر مالوش لزمه ..
وردة بتطير .. يا حلاوة .. ها .. ها ... هُوهُو ...
(يغنى) استنى يا ورده استنى ..

يا شقية وشكلك فى
ليه خفتى أنا مش ح أقطفكم
فين تلقى أطف منى ...
(ضحكات صافية للفراشات) ...

استنى يا ورده استنى ..
وتعالى مع بعض نغنى ..
ليه بس بتعلى عليه ...
تبعدى ونخيبى ظنى ..

(يطارد الفراشة .. يجرد أخرى تشبهه .. ثم أخرى تلاعبه وتطير ..
ونسمع صوت النحلة التي تبدو وكأنها زهرة هي الأخرى .. تسخر منه
في تكبر ، وهي منهكة في العمل .. لا يلاحظها في البداية .. ولكنه
يبحث عن مصدر الصوت حتى يراها .. أذناه تبادلان الحركة ولسانه
يلهث (لازمة عندما يدهشه شيء ..)

- النحلة : كلب .. مغفل .. زززن ..
الكلب : هو .. هو .. ؟ ..
النحلة : جاهل .. ووقته مش ملكه .. زززن ... عمال يضيع وقته ..
الكلب : هو .. هو .. ازز ؟ .. بتكلم ؟ .. مين ؟ .. فين ؟ ...
النحلة : كلب جاهل .. مش فاهم حاجة في الدنيا ..
الكلب : أنا ؟ .. أنا مش فاهم - حاجة . ؟ .. أنا فاهم حاجة طبعا ..
حاجة وحاجات . ؟ .. لكن أنت مين ؟ .. أنت فين ياللى
بيتكلم ؟ ! ..
النحلة : أهاه ! أنا مش (أنت مين) اللى بيتكلم ؟ ... أنا .. (انتى مين)
ياللى بتتكلمى ؟ ! .. تفرق كثير يا جاهل ... ازززن ...
الكلب : اسمعى اما أقولك أو اسمع اما أقولك .. تتكلم .. يتكلم .. :
ما تفرقش انت .. انتى ! . والانتى أنت .. ما يهمنىش .. لكن
ما تشتميش كله من غير لزمه ! .

النحلة : ها .. ها .. مش عارف أى حاجة عن أى حاجة .. ولا حتى عارف
 الفرق بين ديلك وديل المعزه .. يا مرفوع الذيل ! ...
 الكلب : مرفوع الذيل .. مجرور الذيل .. مش شغلك .. لكن أنا لازم
 أعرف أنتى تقصدى مين بالكلام ده اللى مالوش لازمه .
 النحلة : طبعا أقصدك .. انت .. انت ..
 الكلب : أنا ؟ .. ياللهو .. هو .. هو .. ل .. أنا مش ممكن اسمح
 لك ..

(تزن بالقرب من وده فينزح ويخيم رأسه بين يديه)

النحلة : تسمع ؟ .. أنت أى كلام .. انت تسمع .. أو مش تسمع ايه ؟
 .. امشى من هنا .. واسرح .. ززن ..

(يدور ويتابعها وهى تشافه وهو بين الياس والتعجب يتأمل .. طيران
 النحلة وسط تشكيل للفراشات والزهر .. يثير عجبه .. فيدور أحيانا
 معه .. لاهتا ... وعندما يفيق لنفسه يستقر الفراش على الورد أو
 يجنحى ..)

الكلب : ما هو .. هو .. اذا كان الورد صبح بيطير .. مش ممكن يفضل فى
 العقل كثير .. دى حاجة مش تحير بس .. لا .. دى أزمه ..
 تلخبط الحمير .. من غير لازمه ..



مزغلل عينيه .. وقدامك - انتى .. بتكلمينى أهه شخصيا ، أنا
شفتك بعنيه .. وسمعتك بودانى يا ورده أنتى .. ما لهاش
لازمه ..

النحلة : لا أنا ورده .. ولا اللى طاروا ورد ..

الكلب : ياخبر مالوش لازمه .. أمال ايه ؟ ...

النحلة : مش ح أقول لك ..

الكلب : لأقولى .. ؟ .. والا .. خوفتك .. وقطفتك ..

النحلة : انت تخوفنى ؟ انت تقطفنى ؟ .. انت ما تقدرش تخوف نمله ...

الكلب : أنا ما كنتش ناوى أقطف ورد .. لكن بقى أنتى السبب هه .. أنت

المستوله عن سلوكى الوحش ده ..

(يحاول تطفها لتطير .. ضاحكة) ...

(يطاردها .. ولكنها تفرصه فى أذنه .. فيجلس متعبا باكيا .. يصعب

عليها حزنه ويكآؤه فتسترضيه) ...

الكلب : هو أنا .. كنت عملت لك ايه .. الله .. بتقرصينى ليه ؟ ...

النحلة : طب ما تعيطش .. عشان تعرف تفهم ! بس ! . خلاص بقى ..

الكلب : لأ .. ابعدى عنى .. يا ورده قراصة ؟ ..

النحلة : ياسيدى .. لا أنا ورده .. ولا اللى طارت كانت ورده ؟ ...

الكلب : (ناسياً لله) أمال ايه ؟ ... هه ؟ .. قولى لى ؟ ..

النحلة : شفت أنك مش فاهم حاجة .. فيه ورد بيطيير ..
يا (قزعينير!) ..

الكلب : أهه .. أنا جبت حاجة من عندي؟ . قدامي .. أهه .. مالي
الجو .. بيلف ويلف .. حاجة تحلى العقل يخف . ثم أيه (قزعينير)
دي؟ شتمه دي؟ ..

النحلة : يا جاهل .. روح أحسن لك .. ضحكت عليك البطاطس ...

الكلب : بس لو أشوف انتي فين؟ .. أو أعرف أنتي مين؟ .. كنت عرفت
معاك شغلي .. وهو هوتك .. وعرفتك ازاي تكلمى كلب زيي ..

النحلة : ما لوش لازمه .. ما أنا قدامك ومش شايفني .. وأنت مش جاهل
بس .. وكمان عديم النظر!

(تتحرك أجنحتها فيراها) ...

الكلب : انتي؟ .. ورده؟ .. ويتكلم كمان؟ . مش بس بتطيير؟ ..

لا ويتكلم؟! . يا حلاوه .. الورد بيتكلم عربي!

النحلة : شفت أنك مش فاهم حاجة من أي حاجه .. مره تقول الورد
بيطيير .. ومره تفكر أنه بيتكلم .. هو احنا في المسرح؟

الكلب : يعني أنا كدبت؟ .. مش قدامك .. كان الورد طايير .. حواليه

النحلة : (ضاحكه) .. مش ح أقولك .. روح اسأل أى تلميذ صغير ..
يعلمك .. أهم .. قدامك .. اسأل أى واحد يقول لك .. أيه اللي
طار .. يا أبو الأفكار ..

(فرسه للحوار التلقائي مع الجمهور للسؤال عن الفراش والورد ومن
الذى طار) ..

الكلب : طب وانتي مين انتي ؟ ..

النحلة : (تدور حوله وتقرصه) .. مش ح أقولك ..

الكلب : أهه .. بتشوكي أهه ، آى ... انتي ايه ؟ .

النحلة : أنا قرصتك يا أخينا ؟ ..

عشان تروح وتهوينا ..

ألعب بعيد فيه عندنا شغل ..

وضاع كثير وقت علينا !!

الكلب : .. يا سلام ؟ عطلتك عن إيه ؟ .. أنا باتفسح وبالعب هنا .. دى

حتى .. وانت اللي حتبعدى .. ياقراصه .. والا عايزه تلعبى

لوحدهك ..

النحلة : لسه فاكرن بالعب .. يا جاهل ؟ . انت بتتعلم فين ؟ .. وف أى

مدرسة . يا أفندى عشان أقول لمعلمتك .. على خييتك ..

- الكلب : مدرسة ؟ .. مدرسة يعني ايه ؟ ...
- النحلة : يا خبير .. كمان مش عارف يعني ايه مدرسة ؟ .. لا .. دانت عايزلك كمان قرصة تعالى .. هنا .. بقى مش عارف مدرسه يعني ايه ؟ .. (تطارده) ..
- الكلب : ما حدش قال لى .. قولى لى انتى ..
- النحلة : جاهل .. ومش متعلم ...
- الكلب : علمينى ...
- النحلة : مش فاضية لك ورايا شغلى ...
- الكلب : بس شاطره تقرصينى ... فهمينى !
- النحلة : ورايا شغلى .. دور على حد يفهمك غيرى ..
- الكلب : طَبّ انت مين ؟ .. ورايحه فين ؟ .. ورده .. والا ايه ؟ ..
- النحلة : حاول تعرف حاجة بنفسك ..
- الكلب : ما تسيينيش ... من غير ماتفهمينيش ...
- النحلة : فكر ... تعرف ... اسأل تفهم .. وخذ دى (تقرصه) عشان لما تتذكر .. تفكر ... (تضحك) خد دى ، القرصة القاضية .. عشان اسيبك تفكر وأنا راضية . لأن مش فاضية ..

(الكلب في حزن يتأدى عليها ... وهو يكاد يبكي)

(فرصة أخرى للحوار مع الجمهور)

الكلب : هو .. هو .. هي .. هي .. الظاهر ان انا فعلا مش عارف أى

حاجة .. البتاعة اللى بتقرص دى قالت عليه جاهل وصحيح

أنا جاهل ... هيه عارفانى وأنا مش عارفها .. وشافتنى وأنا باقول

على الفراشه ورده ؟ ... وأنا حاجه ملخبطه خالص ... فراشة يعنى

أيه ؟ .. لا وقالت لى أسأل التلميذ . ؟ .. ايه تلميذ دى كمان ؟ .

ليكون بيقرص زيبا .. وهيه فرصتها صعبه قوى .. أمال التلميذ

فرصته تبقى ايه ؟ .. ح اعرف ازاي بس ؟ لكن لازم أعرف .. أنا

لازم أعرف .. وخصوصا .. اللى قرصتني دى ، لازم أعرفها آه ..

وأهو .. هو .. ها

(فجأة يطير حوله سرب من النحل الشغال .. يخاف ويجرى وهو يتابع

في دهشة استمرار النحل الشغال .. والذي يمكن أن يتم على مستوى

المرائس في الخلفية والأقنعة في المقدمة .. وهو يشارك في الأغنية أو في

الرقصة خائفاً .. بالهوهوه أو الحركة) ...

(ويمكن ترجمة حركة عمل النحل إلى عمل إنسان .. كالتنقيب

والتكرير والتعبئة في زجاجات من خلال أعمال بانتوميم كوميدية

وحركات مضحكة ؟ .. كالحمل والنقل والتقطير .. إلخ ... يتابعها

الكلب ويشارك فيها) .

أغنية النحل الشغال :

النحلات : قبل الشمس نقوم صاحبين ..
في البساتين رايجين جاين ..
من زهرة لزهرة بنسافر ..
شغالين مش كسلانين ..
الكلب : هو .. هو .. قولوا انتم مين ؟ ..
النحلات : شد الخطوة ومد جناحك ..
خذ على حضن الورد براحك ..
طير مع ضي النور بصباحك ..
خللى الشجره تصير ملاين ..
الكلب : طب سامعين أو مش سامعين ؟
النحلات : اصحى تملى بدون تأخير ..
ونطير من قبل الندى ما يطير ..
نجمع سكر شهد كثير ..
نملى بيوتنا عسل قناطير ..
وننام ننعس مرتاحين ..
الكلب : هو هو .. استنوني .. فين رايجين ! ..

(الكلب يتبع طابور النحل حتى البيت - الخلية .. وعلى دقائق الموسيقى يقف الكلب مبهورا .. ولا يفهم شيئا مما يجري حوله .. يذهب للبيت يضع أذنه على جداره .. يتضحخ الصوت الذي يسمعه .. يزداد انفعاله .. يحتاج .. في حركات مضحكة .. ثم بعد تردد يمد يده .. في محاولات فاشلة متعددة .. ثم يخرجها وبها قرص عسل .. يلذقه .. يلتهمه .. منفعلا .. (يمكن أن يسأل الصالة عن خبز ؟ ! ...) يعيد الكرة .. ثم على حين غرة .. يخرج طابور النحل المقاتل .. حاملا حرابه .. الكلب يختفى محاولا الهرب ويتنفس الأسلوب يتحول طابور النحل العرائس في الخلفية إلى المقدمة مع تضخم صوت الطنين والبروجى الحرى .. لفترة يظل الكلب مشدوها .. ويظمن قليلا . ثم يعود للهرب ... حتى يقع كالأبله في الحصار ...)

أغنية النحل المقاتل :

للقِتال هيا ..
نحمى حمى الخلية ..
أصل الخلية .. هيه ..
بيتنا وبيت جدودنا ..
نفديها بنور عيننا ..
والى ح يحور علينا ..
راح نهزمه بأيدينا ..

اتصفوا يا جنودنا ..
مادام باحى بلادى ..
وعسلى قوت ولادى ..
مهما يكونوا الأعداى ..
ح ندافع عن وجودنا

(حين يقع الكلب فى الحصار .. يهاجمونه ويلسعونه فى قسوة يتنبه
لحالته .. ووقته فيهرب صارخا فى مبالغة .. وهم يطاردونه فى حركات
كوميديّة)

الكلب : يا خبر اسود مالوش لازمه .. كل ده عشان أنا افكرت الفراشة
ورده ؟ .. وان الورده بتطير الحقونى يا عالم مالوش لازمه .. الحقونى
يا ناس .. مالكم كده قاعدين ساكتين ويتفرجوا . ؟ وكيان
بتضحكوا . ؟ هه ؟ .. بتضحكوا من غير لازمه ... الحقونى
خلاص .. أنا عرفت أن الجهل هو سبب الأزمه ... آه ...
الحقوا ... الحقونى ...

(بعض جنود النحل يهددون الجمهور عندما يتدفع الكلب للاحتواء
... ويغلقون الستارة وهم يبرونه إلى الداخل ..)

المشهد الثاني

(الراوى يداوى جراح الكلب ويلفقه بالأربطة وهو يتأوه مهو هوأ بين يديه ...)

- الراوى : بقى دى عمله يعملها كلب بيّفهم ! .. لو كان فيه كلب بيّفهم ..
الكلب : النحلة قالت ان أنا مش بأّفهم .. وانا مصدقها ..
الراوى : طبعا .. لان هو فيه حد بيّفهم .. يقف لهم لحد ما يقرصوه كلهم .
ويخلوا جلده زى المنخل .. لو كان فيه منخل أصله جلد ..
الكلب : أنا ما أخذتش خوانه .. كنت فاكّر أنهم جاين يعرفون هم
مين . ؟ .. كنت ح أعرف قصدهم أيه إزاي ؟
الراوى : شايفهم شايلين سلاحهم .. ويبرقصوا رقصة الحرب .. لو كانت
الحرب لها رقصة ! .
الكلب : خمونى .. فرجونى .. وبعدين قرصونى .. أنا مقروص خالص ..
حاسس أن ماليش لزمة ..
الراوى : تستاهل .. قعدت طبعا تتفرج .. فانقرصت .. لو كان كل اللى
بيتفرج بينقرص ...
الكلب : افتكرت عاملين لى استعراض شرف ..

الراوى : ليه يعنى .. كنت جييت الديب من ديله .. لو كان الدليل له ديب ..
الكلب : ما تانبنيش بقى .. كلكم عليه .. أنا عقلى قال لى كده
ما فكرتش .. لو كان اللى بيّفكر له عقل ...

الراوى : برافو عليك .. كل اللى فكرت فيه انك تلهف العسل اللى همه تعبانين
فيه .. ما فكرتش انك بتسرقهم والا كنت فاكر ان لىك حق فى
العسل .. لو كان فى العسل .. حق .. لىك .. فيه .. هه .. ؟
حرامى .. سرقت عسلهم .. فقرصوك .. ومعاهم حق

الكلب : أنا مش حرامى .. أنا لمست العسل .. شفته .. دقته .. لقيته حلو
قوى .. كلته .. بس ! .. لكن أنا ما سرقتش ...

الراوى : ياسلام .. حلو قوى لمستته فلهفته .. كل واحد بقى يلاقى الحلو
قوى .. يلهفه .. فوضى .. هيه الدنيا ؟ .. لو كانت الدنيا
فوضى .. قال حلو قوى ! .. قوى حلو قال ..

الكلب : فعلا .. كان حلو قوى .. ياسلام .. لوتقول لى روح انقرص
تانى .. وكل منه .. أكل .. حتى لو انقرص .. تقول لى ..
ياللا ؟ .. أقول لك ياللا .. ما تيجى معايا ؟ ..

الراوى : لأ .. أنت لوحدك .. أنا ما سرقتش حد .. حتى لو كان فيه حد
يتسرق !

الكلب : أنا مش عايز أسرق .. أنا عايز أدوق ... تانى ..
الراوى : ما حرمتش ؟ . تانى ؟ .. طبعا .. مادام فيه أول يبقى فيه تانى ..
وكانى ومانى ...

الكلب : وتالت ورابع .. وحياتك أصله طعمه زى العسل ...
الراوى : طبعا .. همه يشتغلوا ويتعبوا .. وأنت تأكل ع الجاهز مادام
الجاهز .. بيتاكل .. ! .

الكلب : مش ح آكله كله .. أدوق بس .. من غير قرص ...
الراوى : ومن غير تعب ولا شغل .. تاكل .. لوفيه شىء يتاكل من غير
تعب .. (يزغده) ...

الكلب : آه .. حاسب ... نفسى فى لحسه ..
الراوى : طيب .. لما تخفح اخذك لملكة النحل .. تعتذر لها عن العمله
المهيبه اللى عملتها .. لوفيه عمله مهيبه ممكن تعتذر عنها ...

الكلب : وآكل ... آكل .. هه ؟ ..
الراوى : والله دى بقى فى أيديهم .. يمكن لما تصاحبهم يعطوك لوفيه صاحب
ممكن ياخذ ...

الكلب : آه .. مع ان القرص كان شديد .. انما العسل كان ألد .. ياسلام
على لحسه قبل النوم ، كان الواحد يحلم أحلام زى العسل ...

(يغطيه الراوى لينام .. ويتركه)

الراوى : (فى إمكانية حوار مع الجمهور) معلش .. معذور .. أنا شخصيا ممكن
أسامحه .. لو كان ممكن أسامح كلب نيته سليمه .. هو ما كانش
قاصد يسرق ، هو طيب .. مش عارف الفرق .. بين الشجره
والصفاره .. أكثر من كده مش عارف حاجة أبدا .. فى أى حاجة
ممكن تتعرف .. لا راح زيكو مدرسه .. ولا حد علمه .. لو كان
ممكن كلب يتعلم .. هه ؟ .. سامحوه .. زى أنا ما سامحته ..
وادعو له يحلم وهو نايم بالعسل .. فى العسل .. هو صحيح مش
عارف أن الواحد لازم يتعب ويشقى عشان ياكل عسل .. لكن
بالرغم من الكسل هو طيب ويكره يا ما حيفهم ويعرف .. ويعمل
خير كثير آاااه ... قولوا له كللكم وقولولى .. تصبحو على خير ..
هه ... قولو .. لو .. لو ... خير ..

(يرتفع شخير الكلب النائم) وعميمات الحلم ثم طبل ودقات مثيرة ..
يتسلل الفئران الثلاثة .. يفتنون أغنية لصوص الليل بصوت مبجوح
شرير .. وموسيقى غامضة مشروخة .. يرتدون ما سكات وسط
الظلام والومضات الضوئية حركة متسللة كوميدية راقصة يفتنون كاسرين
أحلام الكلب مع النحل (العسل)



أغنية الفئران اللصوص :

يا ليل ضلم ضلامك ..
هش وسكت كلامك ..
خلينا نعرف نسرَق ..
ونمشي من سكات ..
الى اشتغلوا رايحين ..
في النوم وتمباتين ..
نطب احنا على سهوه ..
زي التعلب مافات ..
شغلتنا انا حراميه ..
ملناش في الشغل غيه ..
ناكل من شغل غيرنا
ونعيش خمسين قيراط ..

(على دقات موسيقاهم المفاريتي بمضون - الكلب يصحو ويتبعهم ساكتا
دون أن يروه .. ويتقدمون إلى خلية النحل على المستوى الداخلي في
عمق المسرح يتحولون إلى عرائس يقف أحدهم يجرس الطريق والثاني
يحمل الثالث ليطول الخلية الكلب يراقبهم .. ثم يهاجمهم مهووا ..)

ويطاردهم ثم يحاصرهم ويحصرهم .. ويجبسهم في قفص خلال الانتقال
إلى مستوى الأبنية .. وبينما هو سعيد بما فعل .. يسمع بروجى الحرب
وموسيقى النحل المقاتل ويصر طواير عسكر النحل تخرج من الخلية ..
فيصرخ مرتعبا ويدخل مع الفتران إلى القفص ويقفل على نفسه
معهم ! ..) .

الكلب : يا خبر مالوش لازمه .. الحقونى .. خبونى .. لسه قرصهم معلم فى جلدنى ..
أنا ما عملتش حاجة .. أى حاجة .. يا ناس .. وأنا حتى ما دقتش العسل المرة
دى خالص .. يبقى القرص ازاي من غير عسل .. لا .. فهموهم يا ناس
(يستجده بالجمهور) ان أنا كنت بدافع عنهم ..

(يحيط جنود النحل بالقفص) بينما هو يخفى نفسه مرتعبا يراقب فى
رعب)

النحل : يا كلب إحنا بنشكرك ..
ع الى عملته لاجلنا ..
داخنا جاين نقدرك ..
ليه أنت خايف منا ..
من النهارده ح ننصرك ..
مادمت انت نصرتنا ..
ملكتنا نفسها تشكرك ..

قرب وشرف عندنا ..
(يفتح القفص مترددا غير مصدق)

الكلب : أنا أصل جتتى ..
لسه يانحل مففقفه ..
من كتر ما قرصتيني ..
لسه خلدودي مريقه ..
لكن ملدام فينا الأمان ..
هاتوا العسل قوام بقى ..
(النحللات تضحك وهي تقبله)

الكلب : بالراحة على .. ما تعضونيش .. (يضحك) .. لو القرص بالشكل
ده .. اقرصون .. خدلك قرصة .. وأنت قرصه .. ياللا ما هي
فرصه

النحلة : أظن أنت الوقتي فهمت حاجات كثير ...
الكلب : واتعملت .. وكله بفضل قرصتك الأولى يا قراصه .. فاكراه .. أول
قرصه .. (يضحكون) . إحنا اتصاحبنا من أول قرصه ..

(موسيقى راقصة .. يرقصون معه .. ومن بعيد يأتي موكب ملكة
النحل .. وطابور من حاملي أقراص العسل يقدمونه إليه وهو يأكل
بشراهة .. وحوله الراقصات منهم حتى يشبع)

الكلب : عسل لذيذ متشكرين
الملكة : داخنا اللي شاكرين همتك ..



- الكلب : دا عسل ده والا عنب وتين ..
 الملكة : لو عزت تانى ف خدمتك ..
 الكلب : متشكرين .. متشكرين ..
 الملكة : لنا طلب حدا حضرتك ..
 الكلب : لو تطلبوا منى العينين ..
 ح اكون لكم حارس أمين ..
 الملكة : واحنا حندفع أجرتك ..
 مادام معانا ح تشتغل ..
 حقك عسل على شغلتك ..

(ترقص الملكة بينما يحضر الكلب أدوات الحراسة والعمل في البستان
 ويمكن أن يغير هيئته كبستان حارس للعسل ويشاركها الراوى رقصه
 وعمله .. وغناؤه)

- الكلب : يا سلام خلاص .. أنا ح اشتغل .. وأحمى همى نحل العسل .. من
 كل لص مفترى .. (يشير إلى الفئران) عايز عسل من غير عمل .
 الراوى : مادمت ناوى تشتغل ...
 الملكة : حقك بقى تاكل عسل ...
 الكلب : مش ح اسرقه ولا ح انهبه . ح يجيبنى ساعة ما اطلبه ..

الملكة : محلا العسل .. من غير كسل ..
الراوى : يبقى العمل ...
زى العسل !

ستار

رنگ

رقم الإيداع بدار الكتب ١٩٩١/٨٢٥٩

ISBN 977-01-2829-5

مطابع الهيئة المصرية العامة للكتاب

١٥٠ قرشا